

S A M Þ Y K K T

17

10. marz

fyrir fiskræktar- og veiðifélag Laxdæla.

1. gr.

Félagið heitir Fiskræktar- og veiðifélag Laxdæla.

Heimili þess og varnarþing er á þingstað hreppsins, Búðardal, eða þar sem hann síðar kann að verða.

2. gr.

Markmið félagsins er að auka laxveiði á félagssvæðinu og arð af henni með því:

- a. að stunda laxaklak,
- b. að reka laxveiði fyrir alla félagsmenn sameiginlega á einum stað eða fleirum, ef henta þykir og aðalfundur samþykkir.

3. gr.

Félagið hefir umráð yfir öllum rétti til laxveiði í Laxá í Laxárdalshreppi í Dalasýslu. Félagsmenn eru allir þeir, sem veiðirétt hafa í nefndri á. Félagssvæðið er allar þær jarðir, sem tilgreindar eru í gjaldskrá félagsins.

4. gr.

Veiðiaðferð og veiðitæki félagsmanna skal aðalfundur ákveða til eins eða fleiri ára í senn.

5. gr.

Félagsstjórninni er heimilt að leigja ána eða hluta af henni einstökum mönnum til stangarveiði, ef sýnilegt þykir, að það sé hagur fyrir félagið. Þó má það leyfi eigi vera til lengri tíma en eins árs, nema lögmætur fundur samþykki og tekið hafi verið fram í fundarboði, að slíkt veiðileyfi yrði til umræðu. Arður af slíkri veiði skiptist milli félagsmanna eftir arðskrá

6. gr.

Nú tekur félagið upp sameiginlega veiði, og ræður það þá mann, sem stendur fyrir veiðinni. Hann nefnist veiðistjóri. Veiðistjóri annast um framkvæmdir félagsveiðinnar. Ræður hann menn sér til aðstoðar eftir þörfum. Hann sér um verkun og sölu á veiðinni og færir alla reikninga þar að lútandi, allt í samráði við félagsstjórn.

7. gr.

Félagið starfrækir laxaklak á þeim stað eða stöðum, sem félagsstjórn velur í samráði við fiskræktarráðunaut. Kostnaði við það skal jafna á félagsmenn eftir þeim hlutföllum, sem arðskrá félagsins tiltekur. Klekja skal út ár hvert svo mörg-

- 17 um seiðum, sem ástæður leyfa, þó að minnsta kosti 100 seiðum fyrir hvern lax,
10. marz sem veiðist á félagssvæðinu.

8. gr.

Stjórnina skipa þrír menn, formaður og tveir meðstjórnendur. Skulu þeir kosnir á aðalfundi til þriggja ára í senn. Ganga þeir úr stjórninni á vixl þannig: Formaður gengur úr eftir eitt ár, annar meðstjórnandi eftir hlutkesti eftir tvö ár. Síðan helzt sama röð. Enginn atkvæðisbær félagsmaður getur skorazt undan kosningu, nema lögmæt forföll hamli eða hann hafi verið þrjú ár samfleytt í stjórn. Að jafnlöngum tíma liðnum er hann skyldur að taka við kosningu. Formaður skal kosinn á aðalfundi ár hvert.

9. gr.

Stjórnin hefir á hendi umsjón með öllum framkvæmdum félagsins milli aðalfunda. Hún ræður veiðistjóra, klakstjóra og aðra starfsmenn eg gerir við þá samninga um kaup og önnur kjör, til eins árs í senn. Þó getur stjórnin gert samninga við klak- og veiðistjóra til lengri tíma samkvæmt ákvörðun aðalfundar.

Hún hefir eftirlit með því, að samþykkt félagsins sé hlýtt, og má ráða menn sér til aðstoðar, þó án kostnaðar fyrir félagið.

Formaður er fulltrúi félagsins út á við og hefir yfirumsjón með störfum félagsins og fjárreiðum þess öllum. Hann boðar til funda og stjórnar þeim. Geti formaður ekki mætt, stjórnar fundinum annar meðstjórnandi, eftir vali fundarins. Afl atkvæða ræður úrslitum mála á stjórnarfundum.

10. gr.

Aðalfund heldur félagið í febrúar eða marz ár hvert. Aðalfundur er lög-mætur:

- a. ef hann er boðaður skriflega með minnst þriggja daga fyrirvara og sé fundar-efnis getið í fundarboði,
- b. sé $\frac{1}{3}$ félagsmanna og meiri hluti stjórnar mættur á fundinum.
- c. Nú er aðalfundur ekki lögmætur, og skal þá boða til hans á ný með minnst þriggja daga fyrirvara, og er þá fundurinn ávallt lögmætur.

Á aðalfundi skýrir stjórnin frá störfum félagsins á liðnu starfsári, leggur fram tillögur og áætlun um starfsemi þess á næsta ári. Þar leggur hún og fram endurskoðaða reikninga félagsins, og úrskurðar fundurinn um þá. Aðalfundur kýs stjórn og tvo endurskoðendur félagsreikninga. Hann kveður á um laun stjórnar.

Afl atkvæða ræður úrslitum mála á fundum nema um breytingar á samþykktum sé að ræða eða félagsslit.

11. gr.

Aukafund heldur stjórnin, þegar henni þykir ástæða til, eða $\frac{1}{4}$ félagsmanna æskir þess og tilgreinir fundarefni.

12. gr.

17

Reikningsár félagsins er almanaksárið. Gjaldldagi allra gjalda félagsins er 10. okt. ár hvert. Skulu reikningar fullgerðir fyrir aðalfund og lagðir þar fram endurskoðaðir til úrskurðar. 10. marz

13. gr.

Arði af sameiginlegri veiði og aðrar tekjur, svo og öllum gjöldum, er af starfsemi þess leiða, skal skipt niður á félagsmenn samkvæmt arðskrá og gjaldskrá, sem lögmætur fundur samþykkir og undirrituð er af $\frac{2}{3}$ hluta félagsmanna. Skal hún gerð með hliðsjón af veiðiskýrslum undanfarinna ára. Gildir hún til 5 ára í senn. Náist ekki samkomulag um nýja arðskrá að þeim tíma liðnum, gildir gamla arðskráin áfram.

14. gr.

Eigi má úthluta arði samkvæmt 13. gr. fyrr en eftir aðalfund, enda sé tekjuafgangur á ársreikningi félagsins. Verði útgjöld meiri en tekjur, skal jafna þeim niður á félagsmenn eftir þeim hlutföllum, er arðskrá ákveður.

15. gr.

Brot gegn samþykkt þessari varða sektum frá 100 til 500 krónum og veiði eða andvirði hennar gerð upptæk og renni í félagssjóð.

16. gr.

Lögum þessum verður ekki breytt, nema $\frac{2}{3}$ félagsmanna á aðalfundi samþykki breytinguna.

17. gr.

Félaginu má slita ef $\frac{2}{3}$ félagsmanna samþykkja það.

Samþykkt þessi staðfestist hér með samkvæmt lögum nr. 61, 23. júní 1932, til þess að öðlast gildi þegar í stað.

Atvinnu- og samgöngumálaráðuneytið, 10. marz 1936.

Hermann Jónasson.

Páll Pálmason.